

Por un feminismo d'ermanas de tierra



Esti añu que queamus atrás, peru que tovía ajorramus, mos á impuestu a muchas el miral la vida por una ventana; a otras tantas, el adatal-mus sin remediū alas medías urbanu-céntricas que s'an entanguilau dendi i palas cidais grandis. La primavera arraya i acontinamus en un andanciu que s'á llevau demás de vidas que no golverán, i que á destacau mas la crisi, el margullu i la falta de servicius ena que vivimus. Á teníu de venil un viru pa muestral que esti sistema que no gira alreol dela vida i nel que mos alcuentramus engolletás no se sustieni, i que es el emprenciu namás i la complicación d'otras crisis i pandemias. A esta urgencia climática, en estus tiempus acabarus s'an ajuntau la urgencia social i sanitaria, i no poemus prencipial esti manifestu sin trael a tolas personas harreás del viru i el sistema.

Quiciás que poamus cael en el marru de pensal que las palabras no sonin escapás d'abondu. Peru nusotras pensamus que siguin a sel emportantis. Pesi al aginaeru i al penaeru, las nuestras palabras sonin tamién ecosistemas de pensaerus i acionis que no dessistin pa otras partis. Gracias a ellas poemus vel el mundu, hazel parti d'él, golvel a maginal i premitil el pensal i creyel en otrus huturus ahuera d'esti sistema.

Ermana,

esti 2021 no dimus a salil ala calli comu sotrus años. Estaremus desapartás por una distancia que mos á quitau los besus, los abraçus que llevamus un añu sin sentil, i essas sonrisas que an hondeau las mascarinas. Por essu, ogañu, que las praças estarán mas vazías que nunca, vos convidamus a leyel estas palabras, a hazé-las vuestras, dendi los balconis, dendi los hogaris, i dexal que el humu delas chumineas s'acupi d'ajuntal las nuestras vozis, que l'airi las haga de resultal bien largu.

Esti 8 de marçu no poemus dexal d'alçal la nuestra vos comu mugeris roalis. Porque l'andanciu tamién á trayíu menutus de talandangu; menutus enos que amus vistu comu la ciadanía propia s'entangava i aviava aquellu que las políticas públicas no an queríu ancançal, porque no an síu ni aparentis ni bastantis. Por essu queremos dal-vus las gracias: por aprendel-mus que otras hormas de convivil i de sostribu motu son possibris.

Gracias a esas mugeris produtoras i pensaoras, que dendi abaxu s'an aviau paque los sus alimentus localis i de cercanía pudieran aportar a tolas casas. Mos recordamus mayormenti d'enciativas comu SOS Campesinado, i de tolas jornaleras migrantis que l'añu passau se quearun engolletás endrentu las nuestras fronteras, en un país que no era el suyu, largu delas sus familias i en unas condicionis mu largu de poel dizil-si dinas. Tamién de toas aquellas personas trabajaoras en el setol agrícola i ganaeru que se contagiaron de covid-19 ena primavera i el veranu passaus polas condicionis inumanas enas que trabajavan i vivían, quandu polo craru un sistema de producción intensivu que se sustieni a huerça de no respetar los derechos humanos mas corrientis, ni el comuelgu animal, ni los recusus naturalis ni el territoriu que mos sustieni.

Gracias a toas esas mugeris que no dexan un día solu dassetil al su ganau, ala tierra, de condural las nuestras razas propias i simientis provincias, ruqueandu los nuestrus ecosistemas i la su biodiversidá. Ni el viru ni los nevazus d'esti iviernu an concedíu el apará-las. Porque, si los nuestrus ambientis roalis no sonin zonas de catastrofi, es gracias ala su hincaera i al su trebaju generosu, que la huerça las vezis acontina a sel invisibli i no reconocíu.

Esti añu mos amus queau mas uérfanas que nunca pol mé d'esti viru. Amus perdíu a muchas personas que queríamus: que hazían parti dela nuestra familia, delos nuestrus allegaus, cómpricis cutianus... I, mas que ná, amus perdíu esa gran sabiduría que s'ascuendi tras delos ojos i las manus de tantas mugeris roalis mayoris. Una conocencia dela tierra, del meyu que mos arrodea, ereau delas agüelas delas agüelas delas sus agüelas, que ara cudiarán las frolis i las pieras, i que con ellas s'á díu pa sempri.

Tamién s'an díu con ellas muchas palabras que ya nunca golverán. Angunas, con suerti, averán queau recadás enas ojas d'angún dizionariu local, asperandu quien las despolvi. Porque no poemus descadecel-mus tapocu dela riqueza lengüística que an afiau las mugeris roalis, en dandu nombri a tolas cosas que mos arrodean, i por mé delas que ogañu tenemos la suerti de poel siguil a sentir una gran variedá de lenguas i acentus que hazin únicos i destintus los nuestrus ambientis roalies. Atrás dela lengua i dela palabra ain hormas de vida i atillus fabulosus i únicos.

Tapocu mos descadecemus de tolas mugeris que se ven repuntás pola su variedá i delas nuestras ermanas *trans*. No poemus descadecel-mus d'essas mugeris que palran i ven conas sus manus, ni delas mugeris que caminean a otrus passus. Delas mugeris roalis con penaerus i malotías emocionalis, d'aquellas con albeliais destintas. Mentás locas, mentás ralas, mentás descapacitás. Asseñalás por sel destintas. Duplimenti descadecías i duplimenti afetás dela pandemia.

Toas semus destintas,

i toas,

juntas,

conas nuestras variedais, cudiamus los nuestrus ambientis roalis. Los enllenamus de vida i mos enreamus pa ahilal palantri, descadeciendu-mus d'essas palabras que precipian por “des-” i que tantu aquacan a los meyus de comunicación.

Dizíamus que l'andanciu mos á quitau los abraçus, peru amus tecíu mas redis que nunca pa soponel essa falta de servicius que an malingrau pola pandemia. Aviándu-mus pa llevall comía a quien no poían salil delas sus casas, vesitandu a quien no poían vel a los sus familiaris por estal largu, i endedicandu mas tiempu que nunca a cudial de quien tenemos cerca.

En estus tiempus difícis, muchas mugeris an teníu de combinal los trebajus en el campu, otras el teletrebaju, otras an siguíu amplié'l cañón enos consultorius; con sel maestras, cudiaoras, enfermeras... Tuviendu que estal tol tiempu oportunas palos demás.

Amus oyíu de horma costanti que tenemos suerti abondu de vivil en un puebru, porque tenemos roci derechu cona naturaleza. Peru lo que naidi ve es que aquí los servicius corrientis s'an vistu amenúus por partía dupli; unus servicius que ya eran escassus i que amenúu s'an desaparecíu. Con el viru comu testu s'an afechau centrus de día i comeoris, i s'á amenorau las oras de muchus parvularius i otrus espacius endedicaus a los cudiaus. Amás, muchas familias an teníu que sacal delas residencias a los sus mayoris por mieu a contagial-si, estandu muchas mugeris sin otra que tenel que avial-si pa poel aconllegal los sus trebajus con el cudiau delos sus familiaris dependentis.

Mos recordamus tamién de tolas collaças que an sufríu ERTES, o que an teníu d'afechal los sus comercius pola crisi dimaná del andanciu. Amus vistu cómu, por tiempu abondu, dendi las amenistracionis s'á apuchau enas zonas roalis el bureu comu (quasi) huenti sola d'engressus. Ogañu l'andanciu á hechu que muchas familias en el roal endedicás al bureu lo estén a passal veramenti mal i no tengan otras ocionis.

L'andanciu á aguzau, mas que nunca, la hienda digital. En un añu nel que el teletrebaju á pulau nel nuestro país, mos amus atopau con que mentris enas ciais grandis está aportandu ya el 5G, en muchus delos nuestrus puebrus no ai ni en siquiera banda ancha. Amus encorporau la palabra «teletrebaju» al nuestro acarreu, i pa muchus meyus i amenistracionis s'á envertíu en panacea i salvación delos nuestrus ambientis roalis. Nusotras ogañu queremos revindical el *tierratrebaju*. Queremus siguil baqueandu por tenel accessu ala tierra i a una vivienda dina nel ambienti roal. Queremus que s'ayúin i se sostribin las produccionis agroecológicas i destensivas que están atillás al territoriu, cautivandu alimentus d'empportancia ambiental grandi, criandu un atillu únicu entri persona, animal, simienti i tierra. Queremus dinidá i derechus palas personas migrantis que trabajan enos nuestrus campus. Queremus los servicius púbricus d'aprevu que mos merecemus.

Aína golverá la primavera.

Los nuestrus campus ya luzin una colol verdi que mos hazi pensal en otu amañana. No emporta lo que venga, porque acontinaremos ajuntás, resestiendo alas desgracias. Porque en siquiera esti viru á concedíu el vazial el nuestro territoriu. Acontinamus juntas por frenti dela pandemia. Siguumus ajuntandu los nuestrus puebrus, teciendo redis i atillus, conas nuestras manus entisnás dela colol dela tierra. I mos queamus velaquí ena tierra i conjugamus el verbu: «arrelval», una palabra estremeña que mos devuelvi la esperança i la lus. Senifica sacal el ganau i queá-lu sueltu al monti paque pasti librementi, a relva.

Sabemus que aína amus a poel ponel-mus las manus gimientitu de tierra, toas juntas; miral-mus, i sonriyil.

Por un feminismu de toas,
por un feminismu d'ermanas de tierra.

*El santu es de [Eva Piay](#). Poís descarga-lu [velaquí](#).

**Esti Manifiestu hue escrevíu de Lucía López Marco i María Sánchez. Gracias alos consejus i portacionis de Celsa Peitado, Ana Pinto, Blanca Casares, Patricia Dopazo, Mentxu Ramilo, Karina Rocha, Elisa Oteros i Elena Medel. I a tantas que eis aquellau las vuestras portacionis.

***Esti manifiestu á síu canteau al estremeñu por OSCEC.